

Joel Flepp e Dominic Cadruvi han trenà dus mais. L'emprim di èsi marschè bain per ils dus automaticchers ed els han construi quest model.

Sis giuvenns Sursilvans sa mesiran als Swiss-Skills

Ina curta visita al campinadi da professiuns a Berna

DA CLAUDIA CADRUVI / ANR

■ Els ston sa concentrar e tegnair la dira. Per part cuzzan ils cumbats als Swiss-Skills a Berna quatter dis. La sonda vegn ora tgi dals 900 participants che stat sin il podest e daventa campiu svizzer en sia clamada. L'ann ha visità ils campinadis ed observà giuvenns Sursilvans durant la lavur. Las 135 clamadas che sa preschentan als Swiss-Skills han mintgina sias atgnas modalitads da campinadi. Tar ils automaticchers ed ils electroinstallaturs sa mesiran ils giuvenns e las giuvenas durant quatter dis. La lavur cumenza per il solit enturn las 09.00 e dura enfin las 18.00. I dat mo curtas pausas e tschel temp èsi da dar gas ed avair là il chau. Per ir en sortida la saira na basta l'energia betg pli ed ins ristga l'auto di da far sbaigs. Gliez fiss fatal, pertge la concurrenza è dira. Mo ils megliers da mintga chantun èn sa qualifitgads per ils Swiss-Skills. Per exempel ils automaticchers *Joel Flepp* e *Dominic Cadruvi*. Els han fatg lur emprendissadis tar l'Axpo Surselva e tar la Hamilton a Panaduz.

Joel Flepp e Dominic Cadruvi

Dus mais han els trenà en l'Emax da l'Ems Chemie per quest campinadi. La mesemna èsi i liber: En la halla 2.0 da l'Expo Berna cumenzan plirs teams dad

automaticchers il cumbat. L'emprim di ha mintga team da construir in model d'ina staziun sortira che sto zavarar tocca tenor colur u muster u savair separar la buna tocca da la schletta.

Ils dus automaticchers sursilvans han partì si la lavur: Entant che Dominic construescha la staziun programmescha Joel ils indrizs. Igl è stregn. La saira sto tut esser finì. Durant la lavur resta strusch temp da guardar dretg e sanester quant lunsch ch'els auters teams èn. Cumparegliar n'ha tuttina nagin senn, explitgescha Joel. Era sch'in team ha forsa gia finì ses model n'èsi anc betg ditg ch'il program funcziunia lura propi.

A la fin da l'emprim di han ils dus automaticchers in bun sentiment. Igl è i bain. Ina tala staziun han els gia bajegià durant il trenament. Els quintan dentant ch'i daventia mintga di in pau pli grev. Mintga damaun survegnan els in auter pensum – forsa èsi er ina giada insatge ch'els n'han anc mai fatg. Sch'els gudognan a Berna sa qualifitgeschan els per ils World-Skills 2019 a Kazan en Russia.

Elena Depuoz e Boije Widrig

Elena Depuoz è la suletta dunna dals 15 electroinstallaturs ch'èn sa qualifitgads per ils Swiss-Skills. Ils electroinstallaturs han in pau autras modalitads da cumbat ch'els automaticchers. Els survegnan gia l'emprim di il pensum per tut ils quatter


dis. Plinavant na cumbattan els betg en in team, mabain mintgin da per sai.

Fin la sonda ston els avair construi l'indriz per reglar dus silos cun tschintas da transportar graun, explitgescha in expert. Ils electroinstallaturs cumenzan tar nulla ed han da bajegiari si l'entira regulaziun cun sensorica. Tozzels da cabels èn da colliar e l'apparat da regulaziun è da construir e da montar. Nagin guida. Anzi, els lavuran en la halla 2.2 en in conturn ester nua che visitaders observan e commenteschan tge ch'els fan.

Elena ha fatg ses emprendissadi tar Elektro Cadruvi a Glion. Dal Grischun prenda era part *Boije Widrig* da Cuira ch'ha emprendì tar Elektro Raetus.

Alexi Camiu e Jason Schnoz

Per l'installatur da sfradentaders *Alexi Camiu* da Degen cumenza il campinadi pir oz. En la halla 13 batta el cunter 15 auters participants. Il mazler *Jean-Claude Zimmermann* da Schnaus ha cumenzà ier e sto tegnair la dira fin damaun en differentas disciplinas da sia clamada. Jason Schnoz da Glion ha gia varghentà la mesemna il cumbat, pertge per ils vendiders cuzza il campinadi mo in di. Damaun la saira vegn dà enconuscent tgi ch'ha prestà la meglra lavur e po star sin il podest. Enfin damaun pon ins pia anc tegnair il polesch als 23 participants grischuns.




Il model per zavarar tocca han ils dus automaticchers sursilvans stui bajegiari e programmar entaifer mo in di.



L'electroinstallatura Elena Depuoz na sa lascha betg disturbar da fotografars u aspectaturs e sa concentrescha sin ses pensum.



Tirastruvas, zangas, rispli e lingiala dovran ils electroinstallaturs als campinadis – ma cunzunt era buna gnerva.



Laschar schular e tuttina lavurar exact è impurtant per vegnir a fin cun il reglader per in silo da graun.



Betg scumbigliar in cabel! Boije Widrig lavura svel e tuttina exact.

FOTOS C. CADRUVI



Ina buna referenza: Per las fatschentas che tramettan in participant èsi er in pau reclama.